

# Dad art figurativ fin litteratura e musica

Il chantun sustegna diesch projects culturals

■ **(anr/fa) Dapi l'onn 1998 promova il Grischun mintg'onn la lavur culturala professiunala en chantun. L'uffizi respunsabel ha fatg palais ils nums dals victurs da la concorrenza per projects gronds 2013.** «La muntada da la cultura en la politica actuala crescha allegraivla-main tant sin plaun naziunal sco era chantunal», ha ditg cusseglier guvernativ *Martin Jäger* gievgia a chaschun da la conferenza da pressa, «e quai betg mo per motivs economics, gist tant gogan ina rolla era l'identitad, la patria ed il center cultural.» Dapi l'onn 1998, dapi ch'igl exista la lescha per la promoziun culturala, envida il chantun Grischun mintg'onn artistas ed artists da s'annunziar per la concorrenza per lavur culturala professiunala. «Prender part pon persunas, las qualas vivan da lur lavur culturala, che derivan dal Grischun u che han ina colliaziun stretga cun noss chantun.» Ils ultims onns en vegnids inoltrads mintg'onn en media 80 projects da tut las spartas da l'art, da quels en vegnids sustegnids mintgamai var 20 cun contribuiziuns a lur ovras per l'import total da var 300 000 francs. «Ils criteris per la tschernà en professiunalitad ed autenticitad d'in concept, la cumpetenzza sco era l'originalitad», ha ditg Jäger. *Esther Krättli Jenny*, la presidenta da la cumissiun da questa concorrenza, ed *Armon Fontana* da la Promoziun culturala Grischun han preschentà las victuras ed ils victurs da la concorrenza per projects gronds. Quels survegnan mintgamai 20 000 francs contribuiziun a lur diesch projects.

## L'Alvra invernala en la Lettonia

*Felix Benesch* ch'è creschì si en Engidi-

na e Cuira ed è uss activ en la sparta teater survegn la promoziun per ses project d'ina saira cun musica e teater davart il chantadur ed entertainer *Vico Torriani*. *Ursula Brunold-Bigler* che ha studegià istorgia ed etnologia e lavorà divers onns per il Museum Retic ha l'intenziun d'elavurar in'ovra davart la tradiziun da las ditgas e paraulas en Grischun. Il project dal fotograf *Michael Bühler* che sa concentrescha actualmain surtut sin fotografias analogas da cuntradas ha l'intenziun da cumbinar purtrets da la cuntrada da l'Alvra cun fotografias da la Lettonia. Il musicist *Siegfried Friedrich* ha il project d'ina opera cun num «Hamrun», per la quala el vegn a scriver il libretto. *Stephan Schenk* che abita dapi l'onn 1996 a Lüen vul cun ses project «Kreuzweg» commemorar cun fotografias alvas e nairas il cumenzament da l'Emprima guerra mundiala. *Gian-Marco Schmid* alias «Gimma» survegn la contribuiziun per realisar ses project che cumbina sia musica cun texts. *Seraina Maria Sievi*, creschida si a Panaduz, survegn il sustegn chantunal per ses project d'in roman. Il musicist *Luca Sisera*, activ en la scena da jazz ed improviziun svizra, vegn sustegnì tar ses project «New York-Diaries». L'autur triling *Vincenzo Todisco* survegn la contribuiziun per ses project d'in nov roman. E sco ultim vegn sustegnì il team d'artists *Pascal Wiedemann* e *Daniel Mettler* per lur project che sa numna «sure/secure». Ils victurs da la concorrenza per las ovras pitschnas che vegnan sustegnids cun totalmain 100 000 francs vegnan tschernids durant il mais avust.

## «Ina da las bellas incumbensas»

CUN MARTIN JÄGER HA DISCURRÌ  
FLURIN ANDRY / ANR

### *Tge impurtanza ha la lavur culturala per la regenza?*

**Martin Jäger:** Nus avain ina lescha per promover la cultura ed igl è era reglè en la constituziun ch'il chantun duessia sustegnair e promover la lavur culturala. Igl è ina da las bellas incumbensas da nossas activitads publicas da sustegnair tant novs svilups sco era da mantegnair nossa ritga cultura populara chantunala.

### *Quala è la muntada da la lavur culturala per il chantun triling?*

Igl è previs che nus cumbinain nossa promoziun culturala conscientmain era cun la promoziun da la lingua. La cultura dal Grischun talian e quella da la Rumantschia vegnan tar nossa promoziun culturala adina resguardadas particularmain. Tar tut las surdadas da premis etc. guardain nus adina era che las trais linguas chantunales vegnian resguardadas medemamain.

### *Ha quai er in'influenza per la coesiuin, l'unium da la populaziun grischuna?*

Jau pens che la schientscha da la po-

pulaziun, che nus vivin en questa situaziun speziala trilingua, vegnia gist era cun agid da la lavur culturala adina puspè promovida.

### *Tgenina sparta da l'art plascha a Vos il pli bain?*

Jau hai plaschair da la diversitad da l'art. Persunalmain ma plascha fitg bain l'art figurativ, ma era la musica classica.

Jau vom a fitg blers dals concerts che nus avain sustegnì cun da noss meds.



Cusseglier guvernativ **Martin Jäger**.